

【一碗甜菜卵花湯】梁愛珠原作

十月冬頭割忒禾後，天時漸漸轉秋咧，天氣也涼爽哩，阿姆个菜園肚，種當多菜頭、大菜、大心菜、包心白、結頭菜、高麗菜。這兜菜一睜就知收成後，準備年下揸去街路賣，有伸个炙乾愛入盞園起來。這兜事頭全全係佢兜細人愛搵做个。菜園肚角頭角尾旁脣睜得著另外有種「甜菜」也有人講係香甜菜、皇帝菜。有一息清淡菊花香，這甜菜無論係用來煮湯、焗過滴兜油搵醬、淨炒，非常清甜爽口，做得講係客家人最愛个風味。

菜園肚一大片个菜頭、大菜好摘咧，大人細子背痠痠頭磬磬一頭一頭擲，做到腰骨痠軟，一半下就想企直來伸一下腰骨，趕日頭花出來，菜頭洗淨剝坭禾坭炙，大菜懸在竹篙町炙，臨暗收轉用大醃缸滷鹽後用腳來踩，就變鹹菜，續等過炙就係鹹菜乾、菜脯乾。一雙手一雙腳，因為分鹽水浸濕忒久，十隻手指膠腳腫，時時必開血漬漬，也愛刻耐搵手忍疾做，大人吩咐个事毋敢推，總講爺哀希望屋下過隻好年冬。

有一年冬下頭，堵著寒流來，濕漉漉个天時，這粗重个事一年過一年，儕儕做到腰掛背懸，佢毋堵好嘎寒著，身體陣寒陣

熱，發燒咧，斯懶拐拐。該時莊下時行家家屋屋廳下，壁面都有懸等一種成藥安到「家庭平安良藥」个藥包袋，袋肚有傷風感冒个、顧胃腸个、顧筋骨痠軟个、著傷膏个、貼个藥膏項項有，放藥包个人，逐隻月定時會來換添藥仔，一个月算數一擺，阿姆遽遽尋出一包退燒藥分佢食，過幾下日還係燒無退，燒到會燒人，歸身軟急急，該量時生活清苦，小病無出去街路睜先生。

阿姆心肝掛懸無結無煞，記得該日臨暗發風落雨，佢跔工著等水衣去菜園肚割甜菜轉來，煮一碗燒燒个「甜菜卵花湯」兜在眠床脣，扶等佢跔起來憑¹佢个膺身，一湯匙一湯匙舀分佢食時，有一種清甜个味緒，過無幾久黏時潑大汗，作燒漸漸就退忒了，佢知阿姆種个甜菜膠雞卵係準備愛賣个，平常時毋盼得食，這下為著子女康健愛趕緊復原，爺哀惜子連心，仰般就有辦法。

想起頭擺農業時代，細人發病時節爺哀舂頭磕額尋草藥材，病症無較起色時，正會去街路尋先生睜，爺哀就背囊背等三步做兩步行，苦到連一輛腳踏車就無。一碗簡單个「甜菜卵花湯」，心肝肚就張淦淦个愛。難怪「甜菜」也有人講係皇帝菜。子女著病時有爺哀个照顧，佢兜做子女个有影就像小皇帝樣。

¹ 憑：音 ben`；靠在某件東西上。例：憑凳子。

108 年全國語文競賽客家語朗讀文章國中組（饒平腔）

編號 02 號

【耕種人个子女】陳米英原作

頭擺个生活，六月天公，嘴還嚙等薤菜就愛停動，正經係日日做到兩頭烏。

記得還細時節，阿爸食个頭路係鐵路局个道班工，也就係擎鐵鎚做鐵路个工人，逐日屋下先做一脩事正去上班，所以阿爸个手腳盡煞，不管做麼个事情都當有煞氣，佢兜細人仔，乜無人敢推懶，尤其係緊工時節堵到風搓天，一時滴喊無師父，屋下又無人好換工，乜係喊無工人，全部就搶等愛收成自家个禾穀，若係慢咧一日半日，該橫到歸坪歸田坵个禾仔跔等生芽，一來無法度用機器收割，二來生芽个穀又賣無價數，大半年來个辛苦就分風搓搥到淨淨，正經係膝頭就會出目汁。該量時个田莊人較老實，無像今這下个耕田儕較有常識，會申請政府補助，在佢个印像中，輒常聽著阿爸、阿姆道嘆，耕田人睭天食飯，天係無撿你食，做死乜無人賠，斷真有影哦，難怪會有「人害人肥漬漬，天害人一把骨」个俗諺，這係天災，無奈何，佢俚還係愛認命、順應天理。

想起頭擺，佢屋下个細人仔各有各个事愛做，細俚仔愛掌

牛、割草；細妹仔愛掃地泥、洗衫褲、撿樵、炙穀。講著炙穀緊工時節，家家屋屋都愛自家炙穀，就算請人乜無人冇閒搵手啊！屋下座大个阿姐全部嫁忒哩，伸著佢這講好聽安到「滿女」个就愛核起炙穀个擔頭咧，想著該甲零地个穀，全部愛用祛把，一祛把一祛把硬掃到淨，正經係手工个哦！這下想起該咬人个日頭，歸身汗流脈落，做到出油个樣仔，發夢都還會著驚哦！毋過牙根嚙等又乜過來咧。

今這下無共樣咧，在田坵肚機器行過去就搥到淨淨俐俐、好勢好勢，隨載去農會交濕穀換現金，實在有方便。頭擺佢兜細人仔毋使爺哀講，該做个事情有頭有尾做到好好，讀書人讀書寫字係暗晡頭食飽夜，大人在坪下奈涼泡茶時，佢俚在廳下也係灶下桌頂寫，從來乜毋識無寫忒，第二晨早還愛比人早到學校，想起讀小學該下，係堵著落雨天，赤腳嫵叉，一領水衣布抵等，半行半走去學校，無鞋好著个日仔，回想起來，若毋堵好踏到蟲蟻，走頭無路驚到半生死，有時還會打激顫呢？在這時代有時講分學生聽，無人相信有嘞！

時代一直在進步，生活乜一直改善，電子、電訊取代咧手工个日仔，頭擺艱苦食著毋好个經驗，練就佢這下賺錢个本等，雖然賺無多，毋過最起碼个生活，毋使撻子女伸手乜過得，永遠保留等客家人勤儉堅耐个精神。

108 年全國語文競賽客家語朗讀文章國中組（饒平腔）

編號 03 號

【屋下該扇壁】邱坤玉原作

佢從細戴竹籬茅屋，寒天勉強做得防風，熱天做得抵涼避雨！

阿爸在日本人個會社肚，領著種甘蔗、改菜園、結石腳個頭路。當時分著一支鑊頭、一支擔竿摺兩隻畚箕，就恁樣日合夜無閒做到兩頭烏。正經無法，日仔無恁簡單過——逐日就恁認真做，但係領該毋成錢，過該食番薯籤摺飯粒個日仔。生活都過毋得下去咧，仰有辦法整出體面個屋場？好得還起得起一間蔗葉圍個茅屋，做得起一座土磚個灶頭，全家大細總算有地方做得跔，總算毋會打露！

茅屋個壁係用濫泥膏竹籬起起來個，難免會有必縫。到寒天個時節，寒風在必縫潛入來，寒颼颼實在寒到會死！到熱天個時節，該就鬆爽哪，望毋得涼風鑽入來。

屋下該扇壁正對大門，係屋場最闊個壁，乜係佢兜屋下最鬧熱個壁。該壁就像學校個公佈欄，懸等一隻日本製個時鐘，還有阿爸摺阿姆結婚個相片，阿爸著等西裝摺阿姆同等西式個白紗羅帕，阿姆明顯矮阿爸兩粒頭那，兩儕牽等手盡靚。

該扇壁乜係佢兜屋下最光榮個壁。先用剪開個肥料袋貼等做

背景。貼等大姐做洋裁個靚靚日本妹；有生著相貌堂堂個大哥，摺野狼 125 共下翕個相片；有二哥去成功嶺受訓剃光頭個相片；還有細姊在學校學煮菜時個笑容，生活中個紀錄全部貼在該扇壁頂。

最湛個係兄弟姊妹摺自家領轉來個獎狀，貼做一排一排，該係最光榮個事，大家就恁樣拚命在該領獎。該一排排個獎狀本旦係打拚來個光榮，告知阿姆講：「噃！用獎狀貼等，壁較毋會過風哪！」哈哈！害佢兜分阿姆撩到目汁都會跌下來，正經係窮苦人家個辛酸哪。

其中有一張獎狀對佢一生影響當大。係先生來屋下家庭訪問過後，校長頒個「環境衛生獎」，先生講雖然佢兜戴個係茅屋，毋過該地泥掃到燼金¹、茶杯茶盤搓到蓬白、壁頂獎狀排到整整齊齊，還有屋下頭前、左右兩百公尺都掃到淨淨，值得表揚。

在該時代，大自家戴個屋全係茅屋，該確實係窮苦人個樣仔，空窿空殼，淨伸著壁頂貼等個「獎狀」，該係一條生活下去個希望。係鼓勵窮苦人家個子女放下鑊頭、齧等牙根去讀書，讀出希望，爭取將來有機會坐橫桌，正有出頭天個機會。

三年水流東，三年水流西，隨等時間個推搡，運勢乜會變化。戴咧三十零年個茅屋，阿爸時來運轉興旺起來，就起咧莊肚第一間洋樓！

¹ 燼金：音 lang` gim˘；電光般閃亮。

【細叔婆】李雪菱原作

還當細个時節戴在伙房，記得屋下个伙房肚有當多人，現下大伯戴在上片，佢兜戴正廳，細阿叔戴下片。就恁樣，佢兜細人仔逐日就上片下片走上走下。

頭擺正廳伙房戴大叔公摺細叔公過佢兜共三房，細人仔盡多，叔伯兄弟愛掌牛，老弟不時跔佢兜去掌牛、懸蚬仔、覓蜆仔、撿田螺，無一項毋會，阿爸毋分佢跔，驚走去洗浴仔，無大人在脣頭當危險，係講較暗轉來，分阿爸扭到，該就壞蹄咧，會嘍皮帶¹喔！

佢兜細妹仔還細細，就愛自家暖水²洗浴、洗衫褲、紮草結、煮飯、焗茶……，麼个都會。佢爸食頭路，屋下當早就無蒔禾，毋過，種盡多弓蕉，大出个時節，佢兜愛搵手，孩毋起就用扛个。

共房頭个細叔公當早就無在咧，毋識睭過，細叔婆生來細隻細隻，長透會著藍衫，有烏色个、藍色个，著起來當好睭。佢時常會在禾埕尾梳頭那毛，睭起來當長當長个頭那毛，梳一捲二

捲，紮上去用紅索編起來，再迂幾捲變做一粒饅頭，有時節會紮兩把當靚个髻髻。佢兜幾個細阿妹仔當好坐在屋簷下睭佢梳頭，睭到昏昏喔！心肝肚想：下二擺大乜愛像佢恁樣，著亮亮个藍衫摺梳靚靚个髻髻頭。

係講屋下个大人去田坵做事个時節，細人仔摺細叔婆共下留在屋下掌屋，大个渡細个，下把仔遠遠睭到鷄婆个烏影飛來，細叔婆就提祛把在地泥下緊敲，雞嫵會咯嘞咯嘞緊嘍，細雞子會遽遽走去雞嫵翼下园等，係走忒慢个，就會分鷄婆拖走，這下想著還會心肝嘍嘍颯喔！

該下見擺堵著落雨天，細叔婆會喊佢兜這兜細妹仔遽遽量米提去挨，轉來好做水版。過還會緊念：「一升在來米一升水，一半做甜个一半做鹹个，甜个愛摺烏糖，緊煮緊攏，攏勻漕落碗肚，七分滲就好，炊二十分愛打開來用箸試睭啊會黏米漿無，係毋會就食得咧。鹹个愛炒香料，菜脯乾、香菇、蔥頭切幼幼摺蝦米共下焗香淬一息豆油就好勢咧。」聽細叔婆講到口涎波潑³，佢兜幾個人就做到攏手捋腳⁴。

老古人講：「一人有福，牽帶滿屋。」伙房肚有細叔婆，一生人都有講毋忒个心色事，有笑、有嘍，麼个事情都牽牽連連，佢兜實在有福！

¹ 嘍皮帶：音 sai` pi dai`；被修理，責罰的意思。

² 暖水：音 non` fi`；燒熱水。

³ 口涎波潑：音 kieu` lan` po` bad`；口沫橫飛。

⁴ 攏手捋腳：音 lu shiu` lod giog`；捲起衣袖拉起褲管。

【面仔】魏秋娥原作

民國五十年左右，在僱還細個時節，僱屋下戴在山肚，屋脣有兩大垵土地，一垵提來種柑仔，另外一垵種番薯。該量時有人接成功一種新款个杌仔，逐叢打當結，逐隻杌仔又大又靚，咬起來脆脆又當有水，大家摺佢安到「月杌」，也有人講做「四季杌」，在該時當時行種「月杌」，聽講做得賺當多錢，所以阿爸摺全部个番薯園，改種「月杌」。柑仔摺「月杌」係屋下主要个收入，逐晨早阿爸、阿姆就會揀等果子去市場該搭賣，僱摺阿哥、阿姐也會揀揀。

阿姆教僱兜面上該層定著愛擇外型較靚又勻大个果子，一隻一隻排到齊齊，僱俚客家話安到「面仔」，目的係愛分市場个水果販來割貨去賣，「面仔」排到越好睇，屋下个果子斯賣越多；若係排到毋順人客个意、毋上眼，水果販該兜頭家、頭家娘毋肯摺僱割貨，僱兜斯愛一斤一斤慢慢賣，成時賣到當晝還賣毋到二十斤。阿姆講：「做生理斯係恁樣，牛眼核擲屎肱——睇各人个本等，麼人个『面仔』較合水果販个意，分佢兜行兼來，正有機會請佢兜試食果子，俚屋下个果子正做得賣淨淨。」

成下僱兜也會幾斤幾兩零星賣，識堵到人客，用手指甲這擲一下，該擲一下，想試睇杌仔有水無？罅脆無？分擲過个杌仔黏時多加幾點烏點，恁樣个杌仔就賣毋出咧；僱兜盡驚該專門揀「面仔」來擲个人客，因為分佢擲過个杌仔斯變媠咧，賣出个價數較低，箱仔肚伸个杌仔就更加賣無價咧！該揀肥擇瘦个人客，又好講價，講來講去，又買無幾隻，阿姆總係當愁慮，試著自家無嘴碼當毋壁，講人毋贏，賣到恁少錢。

僱想著好辦法，僱摺杌仔切做一細垵一細垵，用鹽水拋一下，見睇著人客斯行前去請佢試食，僱細細聲講：「阿叔，阿姨，請你試食睇哪！僱屋下个杌仔真脆、真甜又當有水，毋係斯面頂个較大隻定定，籃肚个隻隻像僱肥肥大大，當好食喔！拜託你試食睇哪！」市場肚來往个人客真實全部行兼來試食杌仔，買盡多杌仔轉去，又阿謔僱「恁得人惜」、「恁有嘴碼」、「恁會做生理」、「笑容恁甜」……，買過个人客加兩日又來交官，回頭客盡多，笑等問阿姆：「頭家娘，若屋下這隻『面仔』當靚當大隻！賣幾多錢？」一頭講一頭笑，阿姆講：「這隻『面仔』係天價，賣毋得！賣毋得！」

屋下个生理緊來緊好，阿姆講全部係僱个功勞，僱真實當暢！

【黃杳阿婆】徐姿華原作

阿富叔公做里長三十零年咧，佢當熱心，逐日都會騎等佢該臺老奧多拜，滿哪巡巡睜睜，佢斯像佢兜莊項个伯公，守顧這莊頭。阿富叔婆隨時都打扮到萋婁¹。

萋婁，佢會在耳空脣楔²兩蕊含笑花，摺佢企較兼兜斯會鼻著含笑花个香氣。莊肚个人感謝老里長服務大家恁用心，逐個都當敬重阿富叔公兩公姐。

阿富叔婆在屋脣種一頭含笑並一頭土杳仔，逐日打早，佢愛去伯公下換神茶、燒香个時節，會摘幾蕊含笑去敬伯公；佢也當顧佢个杳仔樹，該頭土杳摺現下个品種無共樣，土杳仔當硬，無異多肉，黃黃个杳仔心，子又密又硬，實在無當好食，毋過，頭擺無麼个零嗒好食，細人總係脰脰脰等該青溜溜个杳仔，一旦杳仔略略轉色，隨時都會分這兜細孬摘去食，成下佢兜若摘著忒青个，咬著還澀澀，將就斯擲在杳仔樹下，阿富叔婆睜著斯會發闕，一有細人佷兼來，佢會嚶嚶滾³緊唸：「恁在賣⁴！恁在賣！杳仔旨好食斯提來摘，無採人个東西。」「這兜細人係無人教招係無？仰般會恁無規矩？」細人聽著阿富叔婆緊罵，斯毋敢過去偷

¹ 萋婁：音 ci`ciog`；光鮮亮麗。

² 楔：音 siab`；塞。

³ 嚶嚶滾：音 giâu giâu gun`；形容抱怨或不滿的聲音，多用於罵人。

⁴ 在賣：音 cai`mi`；浪費、糟蹋。

摘杳仔食咧！

無細人來耗爽⁵，幾隻禮拜過，該頭杳仔樹打到結結結，樹頂个杳仔也對浸青⁶慢慢轉黃，遠遠都鼻得著黃杳仔該熟水⁷个香味，錫來枵鬼个細人仔，也錫來歸陣个蜂仔，飛上飛下。毋過，這兜細人仔，毋敢行忒兼，驚怕阿富叔婆又逐出來罵。聽著細人仔聲，阿富叔婆正經打開佢个柵門行出來，手項擎等一支長長个撈仔⁸，該兜細人一睜啊著，發痴驚⁹幹頭起腳斯走，嘴項還緊喊：「阿叔婆擎竹愛打人咧！阿叔婆愛打人咧！」阿富叔婆在細人背後大聲叻：「噯！細人仔啊！等下！莫走啊！」，該陣細人聽著，還較驚，瀉都無睜著魂影。

第二日下晝，阿富叔婆攞等一袋杳仔，企在對學校愛轉莊肚个橋頭，等細人仔放學；細人仔陸續行到橋頭，阿富叔婆笑咪咪喊：「來啦！杳黃咧！做得食哩啲！」過提出袋肚个杳仔愛送分細人仔食。正開始，逐儕你睜你、你睜你，哪儕都毋敢提，毋過佢个手項香甜錫人个黃杳仔，像在該摺細人仔攞手个樣仔，又過一下，阿雄先行兼去提來食，逐儕睜著正敢去提，兩下半歸袋个杳仔斯分細人提淨淨咧！

原來，阿富叔婆毋係驚人食，佢愛等佢个杳黃咧正愛摘，正做得食得著土杳最好个味緒啊！對該擺起勢，莊肚个細人毋會過驚阿富叔婆咧，毋知哪個細人帶頭个，尾下逐個細人睜著阿富叔婆做下親睜睜喊佢：「黃杳阿婆！」

⁵ 耗爽：音 ho`song`；糟蹋、耗費。

⁶ 浸青：音 zim`ciang`；極青，深綠色。

⁷ 熟水：音 siug fi`；瓜果長成至可收穫的程度。

⁸ 撈仔：音 leu er`；捉魚蝦或昆蟲的長柄網具。

⁹ 發痴驚：音 bod chi`giang`；驚恐害怕。

108 年全國語文競賽客家語朗讀文章國中組（饒平腔）

編號 07 號

【 偲心肝肚个客家味緒 】楊世玲原作

客家菜摻客家人共樣共樣，一隻係重油重味、一隻係重情重義；一隻係鹹甜清楚、一隻係恩怨分明，半點斯無走盞！

剁盤个雞鴨大體係自家屋下畜个頭牲，熟水過無注藥仔，專門食飯糝、菜蓋¹，罕得食飼料，所以皮又貴又油，肉又甜又香。自家做个橘醬，酸合香，滷兜豆油搵阿下去，阿姆哀！該舌嫲係無絹較緹兜，有影會嘎吞落肚屎去啲！還有該滷豬腳，豬腳剁到大嫲圈，滾水燻²啊過，正用細火燻分佢出油，蒜頭米愛掛等皮，敲敲啊放勢落，加兜豆油，靚色又鹹香，過來定著愛用專酒做毋得放水，共下去燻到皮韌肉酪，係驚攪攙會摻蒜頭米摻豬肉皮舞到溜皮，就將該鑊仔摻佢兜起來用拋个，鑊鏟都毋使停動著，差毋多會好咧，正落兜冰糖落去，金頭³又好食！係有這味，食加成碗飯，定著無問題！

粿粿，係客家人桌席頂个招牌，年年節節、好事壞事，係無

脛著這項，總試著無像無像，頭擺个粿粿，係用糯米飯放到掌油个舂白肚，一儕舂、一儕搥⁴，舂到又軟又韌，該下正將地豆麩摻糖粉攪共下來做底，歸大團噴香个粿粿放到面頂，用兩枝箸準剪刀來剪，該就安到斷粿粿，大人細子相爭好，又好爽又好食！

係講著客家人个惜圓，有大粒个有細粒个、有包料个有無包料个，有甜个有鹹个，隨在人擇，總做得擇著自家中意个。有一種接到大嫲隻，撇扁來中央又加撇一隻窟，焯浮撈起來，放入老薑嫲、烏糖水滾到醃醃个料湯肚，揸兜地豆仁屑，摻等食，這就係一等有名个客家燻湯粿，也有人講安到牛搵水，有兜人生成毋好食甜，摻粿粿抑係湯粿提來浸燻肉味，該又係另外一種醃醃个鄉情味咧！

客家菜个好味緒，餵人又心色，逐樣都恁好食，四炆四炒、客家炒肉、豬肺炒鹹酸甜、剁毛蟹醃、菜包、豬腸炒薑絲、鹹菜乾剁豬肉，三日三夜也講毋煞，口涎水溶溶跌，毋知愛仰結煞正好哪！

¹ 菜蓋：音 coi`hab`；指所有蔬菜外層較老較黃的葉子。

² 燻：音 sau`；原用於燻絲，意為將蠶繭煮過再抽出蠶絲；此處意為入熱水鍋滾過再撈起。

³ 金頭：音 gim`teu；看來像黃金一樣，又金又亮的樣子。

⁴ 搥：音 boi`；用手撥開或推開。

【伯公下】邱一帆原作

記得正上小學個時節，在伯公下爽到斷烏¹無半夜，無想著莊肚伯公祠個大門嘎分人鎖起來，共伴個一隻一隻像猴仔樣攀過圍牆出去，單單伸佢一儕在伯公下、大門肚。心煩腦急之下，乜想蹶上門鎖、攀過大門轉屋下去，一無注意，大門頂高像箭樣個細鐵精，好死毋死就撞爛衫褲刺入佢個左手腋下，阿姆哀哀過正得，黏時血流血濯，疾到耐毋得！好得大人睺著遽遽摻佢拗下來，送去分先生止血、消毒、包藥仔。記得該日暗晡當恬靜，無分大人罵，乜無食著大人專門為做毋著事個細子準備個「竹筱版」。這下，逐擺睺著左手腋下個一點疤，就想起小南埔伯公下個故事。

還記得伯公下圍牆脣頭，有一頭牛眼樹，到了避暑就會結出一窩一窩個牛眼，探入伯公下這片來。該係在伯公下爽寮個細人仔最好個零嗒，較高個人伸手就摘得著，較矮個人就愛練會爬牆蹶樹伶俐個功夫，係無，正經會搶毋著來食！食伸個牛眼核，毋會打爽，爽伴仔²會提來做 kin' kang'³爽，講也奇怪，佢會爽到有

¹ 斷烏：音 ton' vu'；天黑。

² 爽伴仔：音 song' pan' er'；玩伴。

³ kin' kang'：玻璃珠、彈珠。

意有思！伯公個後背有一頭香花，佢個名仔聽講安到——夜來香，到了開花個時節，斷烏開始就會散出醜醜個香氣。伯公下好爽個細人仔，總會帶等香味轉屋下，該時節，歸莊個人當像就鼻得著該夜來香味。

伯公下，係佢做細人仔時節爽寮個地方。逐日放學，小南埔莊頭個細人仔打紙牌、射樹乳仔、爽 kin' kang'，大體就會行到伯公下。哪儕較會爽、哪儕較慧當⁴、哪儕較奸宰？在爽個過程全全展現出來，爽伴仔目金金，伯公乜睺現現。佢輒常會想，假使童年係一齣相賽輸贏個戲，莊肚個伯公下，就係最惹目個舞臺。舞臺頂無刀光劍影，但係有紙牌、樹乳仔、kin' kang'還有爽伴仔；舞臺頂無血流血濯個場面，但係有緊張、刺激個心情；舞臺頂無尖酸刻薄個評審，但係有笑微微個伯公，永久，深刻在童年個畫面裡肚。

伯公下係佢童年重要個舞臺，所有在舞臺頂演出過個人，佢還記得：共綱個爽伴仔，隔壁武頓個阿戊伯公當虔誠奉祀清瘦個伯公，慈祥個阿戊伯婆炙鹹菜個身影，輒常食酒醉講心事個阿富伯……，全全還留在佢個印象裡肚。年紀緊來緊大，想著伯公下，就想起童年時節；想起莊肚，想起自家個莊肚人。這下，小南埔莊肚個伯公下既經無圍牆、無大門，乜無細子在該停跔爽寮。毋過，還做得睺著莊肚人帶等自家個子女，過年過節在該敬伯公。

⁴ 慧當：音 ngong' dong'；傻憨。